



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

ZL.Anr.319/2025

PANELI ZGJEDHOR PËR ANKESA DHE PARASHTRESA (PZAP), i përbërë nga gjyqtarët: Violeta Husaj Rugova - kryesues, Bujar Muzaqi dhe Hajriz Hoti- anëtarë, duke vendosur përkitazi me ankesën e kandidatit për asamble komunale në Komunën e Podujevës, nga radhët e subjektit politik LDK Arjant Topanica, e paraqitur kundër Komisioni Qendror i Zgjedhjeve (KQZ), për shkak të parregullsive në Qendrën Komunale të Numërimit (QKN), për Zgjedhjet Lokale, të mbajtura më datë 12 Tetor 2025, në seancën e panelit të mbajtur me 25.10.2025, merr këtë:

V E N D I M

HEDHET E PASAFATSHME ankesa ZL.Anr.319/2025, e datës 23.10.2025, e parashtruar nga Arjant Topanica kandidat për asamble komunale në Komunën e Podujevës, nga radhët e subjektit politik LDK, e paraqitur kundër Komisioni Qendror i Zgjedhjeve (KQZ), për shkak të parregullsive në Qendrën Komunale të Numërimit (QKN), për Zgjedhjet Lokale, të mbajtura më datë 12 Tetor 2025.

A r s y e t i m

Me datën 23.10.2025, PZAP-i ka pranuar ankesën e Arjant Topanica kandidat për asamble komunale në Komunën e Podujevës, nga radhët e subjektit politik LDK, me të cilën pretendon se ka pasur parregullsi gjatë numërimit të votave në QKN në Podujevë, ashtu që pas përfundimit të numërimit të votave është konstatuar se një numër i konsiderueshëm rreth 8 vota nuk figurojnë në vendvotimin përkatës 1814/02 dhe 1814/03 në Sfeçël. Tutje ka theksuar se këto vota janë numëruar dhe dëshmuar të jenë evidente natën e Zgjedhjeve nga vëzhguesit përkatës. Ka theksuar se në vendvotimin 1814/01 ka pasur 53 vota, i njëjti numër ishte paraqitë edhe pas numërimit në QKN, vendvotimi 1814/02 ka pasur 46 vota, pas numërimit në QKN i figurojnë 39 vota, në vendvotimin 1814/03 ka pasur 101 vota, ndërsa pas numërimit në QKN i figurojnë 100 vota. Pavarësisht se këto vota janë verifikuar natën e zgjedhjeve nga ekipet përkatës në vendvotime dhe në përputhje me procedurat e parashikuara nga KQZ gjatë numërimit të tyre është vërejtur mungesa e pashpjegueshme, duke ngrehur dyshime se ka pasur mos regjistrim, humbje ose trajtim të pasaktë të këtyre fletëvotimeve. Ka kërkuar nga PZAP të urdhëroj verifikimin e plotë të procesit të pranimit, ruajtjes dhe numërimit të votave nga qendrat e votimit për Komunën e Podujevës, me qëllim të identifikimit të shkaqeve të mos pasqyrit të rreth 8 votave. Të ndërmarrë masat e nevojshme ligjore për të garantuar integritetin e procesit zgjedhor, duke përfshirë rihapjen dhe rivlerësimin e kutive përkatëse, nëse kjo është e nevojshme.

Në përgjigjen në ankesë Komisioni Qendror i Zgjedhjeve (KQZ), me datë 22.10.2025, ka deklaruar se bazuar në nenin 101 të LZP-së Nr.08/L-228, Rregulloren Zgjedhore Nr.16/2024, Qendrat Komunale të Numërimit (QKN), Procedura e Veprimit në Qendrën Komunale të Numërimit për Zgjedhje Lokale 2025, e miratuar më 01.10.2025, Nr.01/2601/2025, përcaktohet procedura e detajuar lidhur me procesin e numërimit në QKN. Rezultatet preliminare nga vendvotimet mund të korrigjohen në Qendrën Komunale të numërimit në përputhje me paragrafin 3 të nenit 14 të Rregullores Zgjedhore Nr.16/2024 për Qendrat Komunale të Numërimit (QKN). Rezultatet përfundimtare të procesit zgjedhor, shpallen nga KQZ-ja pas përfundimit të numërimit të të gjitha fletëvotimeve nga vendvotimet e rregullta; fletëvotimeve nga votimi me kusht; fletëvotimet nga votimi i personave me nevoja të veçanta; fletëvotimeve nga votimi jashtë Kosovës; vendosjes për ankesat eventuale nga PZAP dhe Gjykata Supreme dhe pas përfundimit të të gjitha procedurave në QNR, ku rezultati i publikuar është i ankimeshëm nga subjekte politike dhe kandidatët të cilët kanë pretendime në raport me numërimin e votave të tyre. Pra, në momentin e publikimit të rezultateve përfundimtare nga KQZ-ja, palët e pakënaqura në pajtim me nenin 105 të LZP-së, pala mund të ushtroj ankesë brenda dyzet e tetë (48) orëve në PZAP.

Lidhur me pretendimet e palës ankuese për mospërputhje të rezultatit zgjedhor, në kuptim të nenit 117 paragrafi 3 të LZP-së Nr.08/L-228, gjatë shqyrtimit të ankesës është vërejtur se pala ankuese nuk ka bashkëngjitur prova relevante që do të mund të dëshmonin apo mbështesnin pretendimet e mospërputhjes së rezultateve zgjedhore. Andaj pas analizimit të lëndës është vërejtur se pala ankesën e ka paraqitur jashtë afatit ligjor për paraqitjen e ankesës, sepse pas konfirmimit të ZEKKKZ në Komunën e Podujevës, aktiviteti I QKN-së është përmbyllur me datën 17.10.2025, ditë e premte në orën 16:00, ndërsa pala ankesën e ka parashtruar me datën 23.10.2025, pra nuk është brenda afatit siç parashihet me nenin 105, paragrafi 1 I LZP-së Nr.08/L-228.

Paneli Zgjedhor për Ankesa dhe Parashtresa - PZAP, pas shqyrtimit të ankesës dhe shkresave të lëndës, gjeti se:

- Ankesa është e pasafatshme.

Në këtë rast, nga shqyrtimi i shkresave të lëndës, konstatohet se ankesa e parashtruar nga Arjant Topanica kandidat për asamble komunale në Komunën e Podujevës, nga radhët e subjektit politik LDK e paraqitur kundër KQZ, ku ka pretenduar se ka pasur parregullsi në Qendrën Komunale të Numërimit (QKN) lidhur me manipulim të votave është parashtruar pas afatit të përcaktuar ligjor.

Me dispozitën e nenit 105 paragrafi 1, në mënyrë decidive parashihet se *"Ankesat lidhur me administrimin e numërimit në QKN dhe QNR, dorëzohen me shkrim pranë PZAP-së brenda dyzet e tetë (48) orëve nga ndodhja e shkëljes së supozuar," të Ligjit Nr. 08/L-228 për Zgjedhjet e Përgjithshme në Republikën e Kosovës.*

Me dispozitën e nenit 9 paragrafi 5 të Rregullores Nr. 01/2025 për Procedurat e Parashtrimit dhe Vendosjes së Ankesave të PZAP-it, parashihet që *"Personi mund të paraqes ankesë në PZAP, brenda dyzet e tetë (48) orëve për shkëljet e pretenduara",* ndërsa nën paragrafi 5.16. parashihet që *"Për shkëljet e pretenduara gjatë procesit të administrimit dhe numërimit në QKN dhe QNR".*

Neni 13, paragrafi 3, nën paragrafi 3.2 i Rregullores Nr.01/2025 për Procedurat e Parashtrimit dhe Vendosjes së Ankesave të PZAP-it, parasheh që: *“PZAP-i e hedhë ankesën kur vlerëson se ajo nuk është dorëzuar në afatin e paraparë ligjor.”*

Në rastin konkret Paneli vlerëson se parashtruesi i ankesës ka dorëzuar ankesën në PZAP me datë 23.10.2025, ndërsa nga të dhënat zyrtare, e po ashtu edhe nga përgjigja e KQZ është vërtetuar me konfirmimin e ZEKKKZ në Komunën e Podujevës, aktiviteti i QKN-së është përmbyllur me datën 17.10.2025, në orën 16:00, me çka vërtetohet se ankesa e ankuesit nuk është paraqitur brenda afatit ligjor prej 48 orëve, siç parashihet me nenin 105, paragrafi 1 të Ligjit për Zgjedhjet e Përgjithshme në Republikën e Kosovës, andaj dhe ankesa u deshtë që të hedhet si e pasafatshme.

Nga arsyet e theksuara më lartë dhe duke u bazuar nenin 105 paragraf 1 i LZP-së, të Ligjit Nr.08/L-228 Për Zgjedhjet e Përgjithshme në Republikën e Kosovës lidhur me nenin 9 paragrafi 5 nën paragrafi 5.16, nenin 13, paragrafi 2, neni 13 paragrafi 3 nën paragrafi 3.2 të Rregullës 01/2025 për Procedurat e Parashtrimit dhe Vendosjes së Ankesave, paneli vendosi si në dispozitiv të këtij vendimi.

Paneli Zgjedhor për Ankesa dhe Parashtresa

ZL.Anr.319/2025 më datën 25.10.2025

Kryesues i Panelit
Violeta Husaj Rugova



Këshilla Juridike: Kundër këtij vendimi është e lejuar ankesa sipas nenit 118 paragrafi 4 të Ligjit Nr.08/L-228 për Zgjedhjet e Përgjithshme në Republikën e Kosovës, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimi të këtij vendimi.